

Dörfligeischer 2020

Übere Hirschhorn am Bahnhofplatz hei mir äs Värslì wöue mache,
U hei üs gfrogt: wie gö mir vor, dass d' Lüt chly müesse lache,
Trotz hirne, dänke, überlege isch üs nüt rächts glunge,
Wüu mir uf das Wörtli Chabis leider kei Riim hei gfunge !

In Biel hetts scho ne Huffe, das isch üs bekannt,
In Brügg plötzlech ou, dasch ganz unerchannt,
Ds Orpund wei si ds Glyche, macht das äch ou Sinn,
Bisch dür all die Kreisle gfahre, de hesch ä sturme Gring !

Trump Trump Trumperidi der Ueli Muurer isch bi-n-ihm gsy,
Aber Änglisch cha der Ueli halt nume e chly,
Doch mir wüsse für was är dört würklech isch gsy,
Trump Trump Trumperidi, dä brucht jede Muurer für das blöde Mürli !

Les panneaux de notre autoroute sont maintenant tous bilingues,
Mais pour nous les suisse totos, c'est vachement un peu dingue,
Ce n'est vraiment pas mieux qu' avant, non c'est encore pire,
Parce que avec cent kilometres à l'heure on arrive plus à tous lire !

Ä Bieler Kulturpriis überchunnt dä Texaszuun,
Dä isch wiiss - u nid öppe brun,
Me sött ne no erhöche u dr Gmeindrat dinn' lo pfuuse,
Wüu dä Zuun kei Ygang hett, chiem si so nümme uuse !

50 Jahr nach der erschte Mondlandig git's jetz wieder ä Run,
Rakete hingere Mond schiesse wär für vieli ä Fun,
Astronautinne chäme jetz ou dra, het me lo verheisse,
I däm Fall isch das für üs klar: die Erschti müessti Greta heisse !

Niemer seit zu Nüt: s' isch Zyt, mir müesse öppis mache,
Do seit Nüt zu Niemer: göu, i lo di scho lo mache,
Aber Niemer macht ou nüt, äs isch gar nid zum lache,
U wüu niemer nüt hett gmacht, tuet d' Schleusebrügg fasch zämekrache !

E-n-Ample hie, e-n-Ample dört, u viellech do no eini,
Dört hinge hätt ou no eini Platz, denn dört steit jo no keini,
Es Verbotsschild hie, u do no eis u-n-es Bäumli hie u dört hinge,
Tät' mir deheim bim Verkehr so blöd, würd's heisse, dass mer spinne !

Auso zersch muesch du emou dis Händy zücke,
U ds Geburtsdatum vor Grossmueter userücke,
U de nid vergässe. sofort Enter drücke,
De chunnt no Gsichtserkennig vo dim Gring,
U verlangt e so ne Code, jo genau der Pin,
So kompliziert, das chasch fasch nid verstoh,
Aber so tuet das jetze würklech go,
Wenn bir nöie Parkuhr ä Quittig wottscheselo !

